

քրիստոնէականներին: Նրանցից ամենահետաքրքրականը Ամիգայի արձանն էր, իր ամբողջ հասակովը ձիգ կանգնած, բարի ու մեղմ դիմագծերով ու ձեռքերը այնպէս բռնած, կարծես օրհնելիս լինէր: Նա յաւերժական ու գաղափարական լոյսի մարմնացումն է:

Միջին, ամենամեծ սեղանի առջեւ կախւած էր ոսկի ծոպերով մի ամպհովանի, որի տակը դարսւած էին զանազան զարդեր, յղկած արկղներ, տուփեր. սրանց մէջ պահուում են սրբազան ձեռագիրները:

Փայտէ վանդակի միւս կողմը ծունկ էր չոքած մի բօնդա (քահանայ) եւ ձեռքի փոքրիկ փայտով խփում էր անդադար կաշէ բարձին, կրկնելով շարունակ միեւնոյն խօսքերը. «ամնա՛, ամնա՛, այդա՛, այդա՛»: Խօսքերը մնում էին նոյնը, բայց ձայնի ելեւէջը փոխուում էր անընդհատ. մերթ բարձրանում էր, մերթ իջնում, բայց երբէք դադար չէր առնում: Դրան մօտ նստած էին մի քանի ուրիշ Բօնդաներ, իրանց աղօթքը արդէն վերջացրած:

Նրանցից մէկը ինձ տոմսակ տւեց 5 ցենտով (կոպէկ), վանքի սրբազան սենեակները դիտելու համար:

Զիւ-ինը բուդղհիստ ժողօ կոչւող աղանդի գլխաւոր վանքն է: Այդ աղանդի հիմնադիրը Ենկօ-Դայշի էր, որ 13-րդ դարում քարոզեց «փրկուլթեան վարդապետութեան» իր նոր ըմբռնումը, որով հաւատացողի համար ճամփայ էր բացուում դէպի ջինջ աշխարհը, դէպի երկինքը, ուր բազմած է Ամիգան: Այդ տեղից էլ աղանդը կոչւեց ժողօ (Pure Zano):